



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

PM Modi INS Vikrant
nung Diwali amung

Nottingham Forest-i coach Ange
Postecoglou mapa nungi anentsüogo



VOL. XXIII ISSUE NO. 14 (ADOK 14) DIMAPUR SANGTENNÜ (TUESDAY) MONGPUTENI (OCTOBER) 21, 2025 ₹ 5.00

Nagaland sorkar mapa inyaker-temi maneni lungkak aittsü

Kohima, October 20, 2025 (TYO): Nagaland nung Joint Coordination Committee (JCC)-i Hombarnü Cabinet Sub-Committee den senden amendang tangatetep kati maruba sülen pen down strike maneni alitsü lemtetogo.

IAS nung Non-State Civil Service (Non-SCS) officers aniokba ken o atema parnok senden amen.

Nagaland nung service association 5 tashi JCC nung dena lir. Parnokji Confederation of All Nagaland State Services Employees Association (CANSSEA), Federation of Nagaland State Engineers Service Association (FONSESA), Nagaland In-Service Doctors' Association (NIDA), Nagaland Secretariat Service Association (NSSA), aser Nagaland Forest Service Association (NF&ASA) teloktem lir.

JCC-i iba onük atema lungkak aitba shilem tasembuba agir aser sorkari October 16 nü iba onük reprangshimtsü atema Cabinet Sub-Committee ka tenteta service associations den jembishinütsü nungloktüsü.

Chief Secretary indang Office Chamber nung Cabinet Sub-Committee den senden amen aser idangji IAS induction process dak sendakba onüktem benok ta JCC-i sangdong ka nung ashi.

"Iba onük ya kanga junga

asadanga jembi aser Cabinet Sub-Committee-i onoki akhangbatem magizüktetba agi State Cabinet dangi abentsü lemtet" ta JCC-isa ashi.

"Iba senden nung lemtet kecha magitet anungji tanga sangdong ka magütsü tashi aser sorkari akhangba ama meinyak tashi onoki lungkak aittsü" ta JCC-isa metetdaktüsügo.

JCC-isa departments aser service associations ajak dang külemi noktaksü aser State Cabinet tatembang lemtet ka mangu tashi tetuyuba agütsüba ama anidaksü ayongzüko.

State sorkari Nagaland nungi IAS cadre nung Non-SCS officers anioktsü merangba anema JCC-i lungkak aiter.

Iba ya inyakyim nung tim masüba aser IAS (Appointment by Promotion) Regulations kübok lateta aliba alema lir ta parnoki ashir.

Iba ashishitep ya "bureaucratic procedural lapse" ka lir ta tawa Government spokesperson-i ashiba sülen

JCC-i tang tagidak pen down strike ya lungkak aitba shilem tasembuba lir. Parnoki tesüiba nung black badge campaign aser poster demonstrations agiogo.

Sorkari IAS induction process nung tim masüba inyakba ya meyanglushi tashi parnoki lungkak aittsü ta JCC-i nenshia metetdaktüsügo.

Manipur DGP-i Meitei-Kuki olemtep alitsü ayongzüker

Guwahati, October 20, 2025 (Agencies): Manipur nung Meitei aser Kuki-Zo kintem tsüngda rara ya timi olemtepba ajanga dang tangatetep kati arutettsü Director General of Police (DGP), Rajiv Singh-i Deobarnü ashi.

Manipur Police indang 134 buba Raising Day sentong nung jembidang May 2023 nung iba rara adokba sülen police-i timtem aika ajangshia arur ta Rajiv Singh-i ashi.

Police department-i akokba tashi yimjung bener arutsü aser tensa süngjemdaktüsü asoshi inyaker ta paisa ashi.

"Asenoki mapang tamajungtem ajangshio, saka tashi itta aser longjemer akoktsü meranger. Onoki akokba tashi tekaraba nung tebilemstütem kottettsü meranger aser tesüiba küm ka ser tesadang nung tensa tajungba akümba nguogo" ta DGP Singh-i ashi.

Meitei aser Kuki-Zo nunger tsüngda rara nung nisung 260

tema taküm samaogo aser nisung meyrjang aika pei talidak toktüsür aotsüsa tensa ajurua lir. Iba dak alia kiojen aser rongsen aika raksatsüogo.

Kin anaprongi olemteptsü atema arutsü mepishir. Tashi ajanga iba ken o tangatetep kati marutettsü aser sendaktepa alir ajak dena olemtep nung dang teti atema yimjung bener arutettsü ta paisa ashi.

"Asenoki yimjung nung putepshiba ajanga dang tejakleni otettsü. Olemtepdak kin anaprong ola angadangtsüla" ta DGP Singh-isa metetdaktüsü.

Iba mepetmesü adokba sülen nungi security teams-i illegal weapons 3,014 aser ammunition 30,000 rounds tema ngutetogo. Maneni, firearms 1,000 aser ammunition 15,000 rounds tem teimba pei sasa mulungteta agütsüogo ta pai ashi.

Taküm küm tetenzüklen taoba Chief Minister N. Biren Singh-i menden toktüsüba sülen Manipur ya President's Rule kübok lir.

Cabinet-i takhangba agizükba sülen CoRRP-i mokdang agiener



5 Tribes Committee on Review of Reservation Policy (CoRRP) purtem senden aliba mapang tangokba noksa angur.

Kohima, October 20, 2025 (TYO): Nagaland Cabinet-i takhangba tongtitem agizükba sülen 5 Tribes Committee on Review of Reservation Policy (CoRRP)-i state sorkar sentong kecha nunga shilem magitsü ta lemteta aliba meyipa agiogo.

Nagaland Cabinet-i agizükba onüktem nung Job Reservation Commission nungi Commission for Review of Reservation Policy ta tenüng melenba dena lir.

"Cabinet-i lemtetbaji onoki September 24 nü state sorkar dangi züluba shidi nung shia aliba

den putepa lir. Wadang balala nung reservation policy asadanga reprangtsü atema onoki zülü" ta CoRRP Convenor Tesinlo Semy aser Member Secretary G.K. Zhimomi nati ashi.

Committee-i sorkar dang pelaba metetdaktüsür aser CoRRP kübok kin hoho pungu- Ao, Angami, Lotha, Rengma, aser Sumi nungeri Commission den amalitepa yariteptsü mulunga lir ta tenati sangdong ka nung ashi.

"State Cabinet-i lemtetba pelashishia agizüker aser iba

lemtet atema tenüngsang agütsür. 5 Tribes CoRRP aser kin pungu tongti hohotemi Commission den yariteptsü" ta sangdong nung shia lir.

Tseminyu District kübok Sendenyu Biodiversity Education Centre, Nphunji nung senden ka amendang kin pungu hohotem aser frontal units ajak nungi nübotem aden.

August 9, 2025 nungi tenzüker kin pungui state sorkar sentong ajak nung shilem magitsü mokdanga aliba agiener ta Committee-isa metetdaktüsü.

NDPP-NPF loktepba ya Tsüngrem tashi ajanga lir: CM Rio

Kohima, October 20, 2025 (TYO): Nationalist Democratic Progressive Party (NDPP)-i Naga People's Front (NPF) den loktepba ya Tsüngremi inyakba mapa ka lir aser iba ajanga Nagaland yimtenren wadang nung telongjem tapak tasen ka lapoker aser regionalism tasen kümshir ta Chief Minister Neiphiu Rio-i ashi.

NPF General Convention jakdang Traditional Central Executive Council (CEC) nung jembidang "party ana ka akümba ya nija ajangzüksü atema masü saka Naga nunger atema lir" ta CM Rio-i ashi.

Rio ya NPF Legislature Party nung leader aser party nung president elect asütsü shimtetogo.

NDPP 6th General Convention sülen Honibarnü NPF aser legislature wing atema election nung pa shimtet.

NDPP aser NPF lennirtemi iba maparen ajunga nung temulung alemba aser amalitepa atema pelaba metetdaktüsür aser iba ya Tsüngremteyari ajanga langzüba sarasadem lir ta Rio-i ashi.

1973 nung United Democratic Front nung adenba nungi tang tashi nung tayongzükbä, tensa balala aser regional political melenshiba aika ajangshia aruogo ta paisa ashi.

2002 nung mezüng Nagaland People's Front tentet aser iba ya Naga Peoples' Front ta melen. 2013 küm NPF MLA 38 lia absolute majority liasü saka iba sülen telok sasep nung telemsa adokba ajanga party tashimait

aküm ta CM Rio-i tesüiba bilemteta jembi.

"Tashi aginüba aser kati ka dak temulung melemtepba ajanga tesüiba nung asenok lemsaogo saka tang tanaben ajurutepeba ajanga telongjem nung asen tashi lir ta nenshir. Regionalism ya Naga maitsü nung tera yanga lir aser iba ajanga party len anitsüla" ta paisa ashi.

Asenoki BJP den tesentaktep ayutsüla kechiyong national party ka den yaritepbaji sorkar ketdangsubaren, terenlok aser Indian Union den Naga nunger taginübatem lemsateptsü atema nüngdaker ta Rio-isa metetdaktüsü.

NPF ya "Peace for Development and Development for Peace" yimyim nung tentet anungji züngsem ajaki pei taginübatem toktüsür nübortem asoshi inyaktüsüla ta paisa ashi.

"Asenoki telongjem, yimjung aser azükaru atema bendanga agütsüshidi. Tenendak lenisüba aser külem mangdang ajanga asenoki ajak atongtsü" ta Rio-isa ayongzüker.

NDPP aser NPF nung züngsem ajaki kü lenisüba nung tamang akaba atema pelar. CEC lemtetba sülen onoki NPF General Convention dang nungi temelaba meshitsü aser iba merger resolution ji Election Commission dangi abentsü ta Chief Minister Rio-isa ashi.

NDPP-i NPF den lokteptsü len aniba ya Chief Minister Rio, Deputy Chief Minister T R Zeliang, aser MLA 32 nunger ajanga lir ta NPFLP leader MLA Kuzholuzo Nienu-i ashi.

NDPP lennirtem aser züngsemtemi iba maparen inyakba piyong amalitepa aser tajung bilema yaritepeba atema tenüngsang agütsür ta Nienu-isa ashi.

Maneni, NPF President Apong Pongener, Secretary General Achumbemo Kikon aser tanga tongti lennirtemi iba mapa nung shilem agiba atema pelar ta paisa ashi.

"Asenok tanaben soshidi aser kati ka ajungkettsü merangtepdü" ta Nienu-isa mepishia metetdaktüsü.

September 6 NPF-i Rio dang party nung tanaben adentsü aser lenisüba menden agitsü formal proposal sülen nungi maparen inyaka aruba asüng NPF 63 buba Foundation Day nung tembangtsü.

NPF working presidents Samuel Risom aser Pusazo Luruo natia party ana ka akümba pelashishia agizükba aser Arunachal Pradesh o Assam nung party ulushia aotsü teimla aliba metetdaktüsü.

Senden nung NPF President Apong Pongener-i tesentepertem pelaa agizük aser Chief Minister Rio, Dy CM Zeliang aser taoba NDPP nungi MLA 30 nem party scarf, table flag aser badge agüja tetushi agütsü.

Senden nung mendenji NPF senior vice president Khongjah Konyak liasü, CBC Ministers' Hill Senior Pastor Rev. Dr. Vevo Phesao-i temoatsü meshia sarasadem aser NPF general secretary Kesoneilie Theünuo-i anküp tepela o jembi.

AASAS, Nagaland University küm 25 ajungba jubilee mungogo



Alumni Association of the School of Agricultural Sciences (AASAS), Nagaland University pur küm 25 ajungba Silver Jubilee nüngtem nung October 20, 2025 nü Multi-Purpose Hall, SAS, NU, Medziphema Campus nung nüngshilong sayaba mapang tangokba noksa ka yangi angur.

Dimapur, Mongputeni/Oct. 20 (TYO): Alumni Association of the School of Agricultural Sciences (AASAS), Nagaland University pur küm 25 ajungba Silver Jubilee sentong Multi-Purpose Hall, SAS, NU, Medziphema Campus nung October 20, 2025 nü agia liasü.

Sentong akhumdong Advisor, Agriculture, Government of Nagaland, Mhathung Yanthan aser Chief Host ya Minister, Rural Development and SIRD, Government of Nagaland, Metsubo Jamir (1st Batch) aser Honored Host ya Advisor, Fisheries and Aquatic Resources, Government of Nagaland, A. Pangjung Jamir (5th Batch) liasü.

Iba benjongmung tenzüka Advisor Mhathung Yanthan-i Silver Jubilee Monolith sayatsü aser Advisor A. Pangjung Jamir-i Alumni Flag songa liasü.

Prof. L. Daiho, Former Dean, NU, SAS, Medziphema Campus ajanga sentong tenzüka sarasadem aser K. Neibou Sekhose, Chairman, Organizing Committee aser AASAS indang mezügbuba tir ajanga pela agizükba o jembia liasü.

Dr. Imliakum Ao (29th Batch) aser Dr. Chubatemsu Ozukum (27th Batch) lenisüba kübok Alumni Choir ajanga ken ka aten aser senior alumni temi SAS nung ajangshibatem lemsatepa liasü.

Prof. Akali Sema, Secretary, Organizing Committee aser AASAS indang mezügbuba tongti zülur ajanga "Journey of AASAS" indang onük lemsatepdang association alizüing tongtetba, takok anguba aser ainba indang jembi aser iba sentong nung medentetba tesüiba Alumni züngsem temi jembi video clips sayua liasü.

Takok balala anguba Alumni tem tushiba sentong ka agiba sülen Alumni Association tir Prof. L. Tongpang Longkumer (5th Batch) ajanga Academic Excellence Awards agüja liasü.

Iba sülen Minister Metsubo Jamir aser Marthon Sangma nati o tatsütsü jembi aser Prof. Dipak Sinha, Pro-Vice Chancellor, NU, SAS, Medziphema Campus ajanga tepela o jembia liasü.

EU Choir ajanga temeja ken ka atenba sülen Silver Jubilee Souvenir saya liasü.

Advisor Mhathung Yanthan-i sentong nung jembidang, ibai Alumni Association, SAS küm 25 ajungba benjongba kisüing masü saka küm 25 tashi tajungtiba, bendanga agütsüba aser temelenshi akaba, küm 25 lanurtem anitetba, tarutsü jenjang yangluba aser Nagaland aser alema oa aluyimba tsütsü terenlok mapa tajung inyakba benjong lir ta ashi.

Asenok service nunga liang mesüra anisüngzük ngura liang, tain-a süang tanur-a süang, iba

jubilee ajanga asen arok nükjidong bendanga agütsüshir inyaktsü asendenshitsür, ta pai ashi.

Asen aluyimer tem ajungkettsü, lanurtem nemshisatsü aser skills agüja tashi agütsütsü, asen libajen wazüka ayutsü aser tongtipangsa aluyimba ya ajaki akumtsübobba mapa ka kumdaktsütsü asoshi asenok ajaki züngzükteper inyaker, ta Advisor Mhathung-i ashi.

Alumni temi region nung aluyimba aser rural development sectors asoshi maneni yariba asoshi pai tenügsang agütsü.

Hoto Yeptho, Organizing Committee Member (1st Batch) & 1st Advisor, AASAS ajanga melepzüing o jembia mezüing sentong tembanga liasü.

Tanabuba sentong Technical Session nung Prof. Pauline Alila (5th Batch), Dean, NU, SAS, Medziphema Campus menden liasü.

Iba sentong nung tanü-asüing aluyimba nung ajemdaker shisa lemsatepa sensaksema liasü.

Nikongdang 4:00 ako nungi AASAS indang General Body Meeting amen, koba Prof. L. Tongpang Longkumer (5th Batch), President, Alumni Association lenisüba nung agia liasü.

Iba sülen sobaliba sentong Dr. Watilmongla Jamir (9th Batch), Former Director, SAMETI ketdangsüba kübok agia liasü

Kohima nung mejangjaba nisung tasü mang ka nguteta lir

Dimapur, Mongputeni/Oct. 20 (TYO): Mejangjaba nisung tasü mang ka Sechü (Zübza) Police Station, Kohima kübok Jotsoma by-pass anasa nguteta lir ta October 20, 2025 anüngdang 11:30 ako meta osang aru, ta Kohima Police sangdong ka ajanga ashi.

Nisungba ya tebur (non-local) arishi küm 45-50 tsüingta, sentsü tamang, tar süklep 5.4 aser jacket sentsü tanak aser track pants sentsü tanak sema liasü.

Ozüing agi melaba maparen ajak inyakba sülen tasü mang ya jangjatetsü asoshi North Police Station nung yua lir.

Kibur, kinunger, tembar aser mesüra shiri asür indang osang meteta alir, parnoki Officer-in Charge Sechü (Zübza) Police Station den 8730934749 mesüra Officer-in Charge North Police Station, Kohima den 6009308087 ajanga tongteprateptsü akok, ta Kohima Police sangdong ajanga ashi.

Taküm Mizoram nung TB agi nisung 121 asü

Aizawl, Mongputeni/Oct. 20 (Agencies): Mizoram nung January ita nungi October 10 tashinung Tuberculosis (TB) agi asür nisung 121 aser iba tashidak agi meneper nisung 1,870 lir, ta state health department ajanga ashi.

Department indang data ajanga ashiba agi, state nung blood samples 97,647 tendangba nung tetsür 744 densema nisung 1,870 dak tuberculosis agi timtema aliba ngutet.

Kasa mapang nisung 121 dak multi-drug-resistant tuberculosis (MDR-TB) putet aser nisung 211 TB aser HIV-positive agi timtema aliba ngutet ta ashi.

Iba tashidak agi menepa alir shilem 82 takok ngua taneptsü nguogo ta data ajanga ashi.

TB agi meneper nisung 1,870 aliba nungi arishi küm 14 tema nisung 1,761 aser nisung 104 arishi küm 14 tekübok lir.

2020 nungi TB agi shiranger aser asürtem ya timba akumer ta health ketdangsür temi ashi.

2020 küm TB agi nisung 31 asü, 2021 küm nisung 46 asü, 2022 küm 119 aser 2024 küm 136 asü, ta parnoki ashi.

2020 küm nungi tenzüka tesüiba küm pongu tsüingta TB agi asür nisung 540 lir, ta parnoki ashi.

Tesüiba küm pongu tsüingta iba tashidak ya nisung 11,000 dak tema dak puteta liasü aser timtiba ya 2024 küm nisung 2,307 dak putet aser 2023 küm nisung 2,115 dak putet.

Nisung 100 dak temai TB agi shiranger yaritsü mesüra Pradhan Mantri TB Mukta Bharat Abhiyan kübok "Nikshay" online sapang nungi tenla agütsütsü tenüing agütsüogo ta health ketdangsür temi ashi.

Pradhan Mantri TB Mukta Bharat Abhiyan ya Tir Droupadi Murmu-i September 2022 nung linük tesem ajunga nung tenzüka liasü.

Assam nung ano taila doctor ka puogo

Guwahati, Mongputeni/Oct. 20 (Agencies): Taila medical practitioners maneni apuba nung shilem ka ama Assam kübok Chachar Police ajanga taila doctor ka Hombarnü puogo.

Iba ya ajanga district nung taila doctor apuba 13 ajunger.

Tai tonglokja alisang ya Bipul Chandra Nath ta jangjatetogo aser pa matric tashi zünger süaka tiazü nung "Dr. B.C. Nath" ta amshia shirangertem anepalua aru.

Cachar Superintendent of Police (SSP) Numal Mahatta-i ashiba agi, Nath-i pa indang medical qualification meshidak yanglur küm aika nüburtem ashiokja aru.

Osang tejangja kar angazükba nung ajemdaker police temi Silchar kübok Ambicappaty area meita ao, aser iba mapang Nath ya apu aser taila MBBS degree ka densema taila medical documents tem ngutet.

"Tai tonglokja alisang ya medical background shidak nungi masü aser tajangzük asoshi taila kuli amshia shirangertem mashi lenmang nung anisa," ta SSP Mahatta-i ashi.

Police temi Silchar Police Station nung ken o ka benoka bushisüingdangba mapang lir.

Nüburtem nem awareness tali agütsüba ajanga iba amala taila temai adoktsüba nung yarir, ta SSP Mahatta-i ashi.

Ozüing amshirtemi clinics, mozüki aser health centres nung surveillance tali kumogo aser medical staff tem kanga junga jangjatepba mapang lir, ta pai ashi.

Paisa iba ama ashi-külak mapa inyakertem bushitsü aser aibelener nem tapet temerenshi agütsütsü ta ashi.

September ita nunga police temi ghonda 24 tsüingta iba ama taila doctor ana pua liasü.

Tawa Assam tesem balala nung taila medical practitioners 22 shi puogo.

Manipur nung retired doctor tepsetba anema longkak ait

Imphal, Mongputeni/Oct. 20 (Agencies): Yaiskul Chingakham Leirak nung arishi küm 67 tain retired physiotherapist, Dr. Asem Rita Devilar kidang October 13, 2025 nü tepsetba asoshi ochi obendang khanga Deobarü Manipur nung Imphal West kübok Singjamei Chingamakha nung nüburtem mener longkak aita liasü.

Dr. Rita ya taoba mapang Regional Institute of Medical Sciences (RIMS) nung inyaka liasü aser lar jabaso asoba anogo nung lar kidang tasü ngutet.

Iba tatalokba ya angashia nüburtem aser talisa tetsür tem

pei kidanga takum kumzüka mali ta tetsübo aita dakja nüburtem jashitep.

La tepsetba ajanga nüburtem kanga sashia aoksatsüogo aser tetsürtem anisüngzük makai kumogo, ta longkak aiter kati ashi.

Iba lendong ataloker anogo ishika süyiaka ketdangsür temi nisung kata meputetba atema lai aitsü aser tekeraba nung mera agitsü ajungshia liasü.

Nüburtem mulungjang nung tetsübo malitsü aser tetsür temeden wazüka ayutsü aser kumzüka alitsü asoshi Dr. Rita nem ochi obendang agütsütsü nüngdaker, ta lai ashi.

Police aser forensic team temi lendong atalokba tesem semdanga kuli bendena bener ogo, saka parnoki temulung melemteter kata mejangjatet mesüra mapu.

Ketdangsür temi bushisüingdang manener ta ashi, saka parnoki tang tashi tsüingsü monguteter.

Longkak aiter temi Dr. Rita tepsetba aitsü aser ketdangsürtem dang tekeratiba nung bushisüingdanga aibelener nem menua melie obendang agütsütsü akhanger.

Parnokisa state nung tetsür tem kumzüka ayutsü mechi mera tajung agitsü ajungshir.

PM Modi INS Vikrant nung Diwali amung



October 20 nü Ato Kilonser Narendra Modi Goa aser Karwar tzüküm nung INS Vikrant nung naval personnel den Diwali benjung amungba mapang tangokba noksa nung angur.

New Delhi, Mongputeni/ October 20 (Agencies): Ato Kilonser Narendra Modi-i Hombarnü ashiba agi, Operation Sindoor mapang armed force tem kanga junga sendaktepa inyakba ajanga Pakistan bendanga agütsüdaktsü.

"Indian Navy-i tetsübu adokdaktsüba. Indian Air Force-i skill tajung sayuba. Indian Army tasü aitba. Iba force asem kanga junga sendaktepa inyakba ajanga Operation Sindoor mapang Pakistan kanga kara bendanga agütsüdaktsü," ta PM Modi-i INS Vikrant nung sepaitem den jembiba mapang ashi.

Ato Kilonser-isa, INS Vikrant ya Aatmanirbhar Bharat (self-reliant India) indang temaitsüka lir ta ashi.

"INS Vikrant ya Aatmanirbhar Bharat aser Made in India temaitsü ka lir. Kidang yangluba INS Vikrant ajanga India military tashi

sayur," ta PM Modi-isa shisem.

Pai ashiba agi, INS Vikrant ya warship ka dang masü saka aso 21buba nung India-i meranga inyakba, sempet aser bendanga agütsür aliba kuli lir.

Ato Kilonser Modi-i sepaitem den Diwali benjung munga arudar aser taküm iba benjung ya Goa aser Karwar tzüküm nung INS Vikrant nung sepaitem den mungogo.

PM Modi-i sepaitem den sensak asem aser ashiba agi, Naval personnel tem den tesangwa benjung mungshiba ya pa atema kanga tia taka.

262-metre-talang INS Vikrant ya ton 45,000 shi lir, koba taoba yangluba rong dang nungi kanga agi tuluba aser advance-ba lir. Rong nem Gas Turbine pezüi tashi agütsür koba power MW 88 asütsü aser rong indang maximum speed ji 28 Knots lir. Rong ya sen crore 20,000 entoka yanglu. Iba project ya

shilem asem küma lemsar inyak koba mezüngbuba May 2007 nung tembang aser tanabuba o tasembuba na December 2014 aser October 2019 küm tembanga liasü. Rong ya MoD aser CSL nati yanglu.

Rong indang keel ya 2009 küm February ita amenok aser 2013 küm August ita lunch süa liasü. Rong nung osettsüset balala enoka yangluba ya shilem 76 bo linük nung yangluba lir, aser IAC ya "Aatma Nirbhar Bharat" tatishitsü tajungtiba lir.

Rong nungi MIG-29K fighter jets, Kamov-31, MH-60R multi-role helicopters, Advanced Light Helicopters (ALH) aser Light Combat Aircraft (LCA) (Navy) amala tayimtsü 30 tashi inyaksangshitettsü.

PM Modi-i taoba küma Diwali ya armed forces den Indo-Pak arrtsü anasa Kutch nung munga liasü.

JMM party Bihar election nung metokteptsü

New Delhi, Mongputeni/ October 20 (Agencies): Hemant Soren-i aniba Jharkhand Mukti Morcha (JMM) puri parnok telemtetba melenshia taruba Bihar Assembly elections nung metokteptsü ta sangdongogo.

Osangbenertem den sensaksemba mapang JMM lenir Sudivya Kumar-i ashiba agi, par party-i Jharkhand nung Congress aser RJD na den tesendaktep asadangshitsü aser tapet telangzüba ka agütsütsü.

Hemant Soren-i aniba party yagi taruba election nung parnok shinga dena mesendaktepi menden trok

nung tokteptsü ta ashiba sülen anogo ana lir tang iba telemtetba ya agiogo.

Menden lemdangtsüba dak sendakba nung INDIA bloc yongtsü nung ken o mejangjaba küma aoba mapang ka nung tang KMM puri iba jenjang agiogo.

"RJD aser Congress nati JMM pur election nung metoktepdaktsütsü atema jenjang agi. Iba atema JMM-i tapet telangzüba agütsütsü aser RJD o Congress na den tesendaktep ya asadangshitsü," ta state tourism minister Kumar-i ashi.

Congress-i taruba Bihar Assembly elections atema

Brehostibarnü candidate 48 tenüng sangdong. Candidate tem rongnung state unit tekolakba Rajesh Ram Kutumba menden nungi aser CLP lenir Shakeel Ahmad Khan Kadwa nung tokteptsü. Iba sülen ano party-i Hokolbarnü Jale nungi Rishi Mishra tokteptsü ta sangdonga liasü. Honibarnü party-i candidate pongu tenüng sangdonga liasü.

Maneni Congress party-ia iba election atema Hombarnü ano candidate trok tenüng sandongogo. Item candidate trok densema Congress-i ajak senteper candidate 60 tenüng sangdongogo.

Ladakh sensaksem October 22 nü tenzükshitsü

New Delhi, Mongputeni/ October 20 (Agencies): September 24 nü Leh nung azütokshi lendong atalokba obendangertem nem bushisüngdangdaktsütsü atema Union Ministry of Home Affairs (MHA)-i tetuyuba agütsüba sülen Ladakh nung lokti tentetemi Centre den October 22 nü sensak asemtsü mulunga agizükogo.

September 24 nü police temi longkak aiterterem dak injang khaloktsüba sülen nisung pezü tepseta liasü.

Ladakh nem state jenjang aser Sixth Schedule status agütsütsü atema khanga longkak aitba mapang azütokshia lendong atalokba den National Security Act (NSA) kübok climate activist Sonam Wangchuk apuba sülen, Apex Body, Leh (ABL) aser Kargil Democratic Alliance (KDA) nati Centre den October 6 nü sensak asemtsü aliba thiya liasü. Police temi injang khaloktsüba dak sendakba nung obendangertem nem ken o bushisüngdang mesüdaktsü tashi sensaksem nung shilem magitsü ta iba lokti tentet ana yagi shia liasü.

Brehostibarnü MHA-i, ken o ya taoba Supreme Court judge, Justice B S Chauhan-i bushisüngdangtsü ta metetdaktsüogo. Police-i longkak aiterterem dak injang khalokja nisung pezü tashi tepsettsüsa kechi atalok iba ya jangjatsü atema bushisüngdang asütsü.

Iba tetuyuba agütsüba ajanga Centre aser Ladakh nung political movement aniba lokti tentet ana sensak asem

tenzükshitsü lenmang lapoktsüogo.

Source temi ashiba agi, October 22 nü senden nung Minister of State, Home, Nityanand Rai lenisüba nung tenteter aliba High Powered Committee (HPC)-i shilem magitsü. Ladakh takhangba dak sendakba nung ken o tem bentettsü atema iba committee ya tenteta liasü.

"Iba senden ya HPC indang sub-committee senden ka asütsü. Senden nung ABL aser KDA naprongla nungi züngsem asemsem aser MHA ketdangsür tejentem aser Ladakh MP-i shilem agitsü," ta ABL co-chair Chhering Dorje Lakruk-i ashi. Paisa, senden takaratiba nung amentsü atema latetba atema pelaba lemsatepa liasü.

Toba ita mepetmesü adoka police temi nisung pezü tashi khasetba sülen Centre aser Ladakh nung lokti tentettem tsüngda temulung melemtep tali kümogo. Ajisüaka Centre-i ken o ya obendangertem nem bushisüngdangdaktsütsü atema telemtetba agiba ajanga sensaksem asoshi lenmang lapoktsüogo.

Sources-isa, Rai iba senden nung medentettsü, kechiyong pa Bihar-i oa lir, koba taruba ita election agitsü lir. Ajisüaka Jammu and Kashmir aser Ladakh indang joint secretary den tanga ketdangsürtemi iba senden nung shilem agitsü.

Senden nung ali kümzüka ayutsüba, public service commission amenoktsüba aser Ladakh nem Lok Sabha MP ana agütsütsü asoshi sensak asemtsü imlar.

Bihar election atema RJD-i candidate 143 tenüng sangdongogo

New Delhi, Mongputeni/ October 20 (Agencies): Rashtriya Janata Dal (RJD)-i Hombarnü taruba Bihar assembly elections, atema candidate tem tenüngsang sangdongogo. Parnoki party lenir Tejashwi Yad densema candidate 143 sangdongogo.

Election tanabuba aser tatembangbuba shilem atema nomination paper benoktsü asoshi tatembangbuba anogo nung candidate tem indang list ya sangdongogo.

RJD lenir Tejashwi Yadav iba election nung Raghapur constituency nungi tokteptsü. Party-i iba election atema tetsür candidate 24 nem ticket agütsüogo.

Iba osang sangdongba ajanga Mahagathbandhan alliance den menden lemdangba jangjashitsür. RJD menden 143 nungi tokteptsü, Congress menden 61 aser CPI

ML menden 20 nungi tokteptsü.

Kasa mapang nung Congress party-ia iba election atema Hombarnü ano candidate trok tenüng sandongogo. Item candidate trok densema Congress-i ajak senteper candidate 60 tenüng sangdongogo.

BJP-ia taruba election atema candidate 101 tenüng sangdongogo, koba NDA yongtsü nung menden lemdangba dak ajemdaker metetdaktsüogo.

Ato Kilonser Narendra Modi-i Bihar nung October 24 nü nungi tenzüka nüboyimba sentong balala nung shilem agitsü.

Bihar election ya shilem ana küma lemsar agitsü. Mezüngbuba shilem November 6 aser tanabuba November 11 nü agitsü. Result ya November 14 nü sangdongtsü.



TIR YIMYIM YIMOBILEM (EDITRIAL)

DIMAPUR TUESDAY, OCTOBER (MONGPUTENI) 21, 2025

Nütsüng züintsü nüngdaker

Mokokchung district nung nütsüng kanga ajema akümba indang kuli bushitsü asoshi Ao Senden, ABAM aser Mokokchung Ao Officers' Telungjem külem senden nung lemtetbaji kanga tongtiban teinyaktsü mapa ka reprangteta lemtetogo ta angateter. Asenoki asen lima tapu tapu inyaktsü bilemyonga nütsüng melira meinyaktettsü, kechiyong kechi mapa aser sentong südirsüaka talir aser tagir alitsüla. Aji oda, kasa senden nung asen kin asoshibo lokti tentet tematiba asemi Impur Christian Hospital tajungba küma aotsüsa inyaktsü lemtetbajia Mokokchung district nung nütsüng melira takok ngua melapoktettsü. Atangji, nütsüng ta asüdang asenok mulungjangi jet ta census aser electoral roll agitsüba indang arur, kechiyong census nung nütsüng aika ali nung dang electoral roll nunga voter aika alitsü aser voter aika lira assembly constituency-a iba yariji aika alitsü. Ajisüaka, nisung mali ser nütsüng aika mekümtettsü aser nütsüng melira temalen shisemba amaji mozü kia takok ngua melapoktettsü, kechiyong shiranger malitsü, school aser college a melapoktettsü kechiyong nütsüng nübo mali nungji tazünger malitsü aser assembly-a constituency-a ajemtsü, kechiyong vote agütsütsü pur nisung malitsü. Shishilembaba nunga hotel, restaurant aser shopping mall kata tajangzük ngua melapoktettsü, kechiyong talir malitsü. Aji oda, nütsüng melira train aser bus senzütsüa nüngdak madoktsü, kechiyong oliorar tesenzür malitsü. Anungji, asen lima renloka aotsübaji alinük dang masü saka nütsüng nüngdaker aser nütsüngji tiyazü mesayutettsü aser tiyazü sayutsü merangbajia Tsüngrem tsüngdang tai asütsü. Atangji, nütsüng kechi kodaser ajemer ta bushitsüba dang nungibo nütsüng kechi kodaser renlokdaaktsütsü ta bilemdangtsübjang ano tongtibangba akümer. Nütsüng ajema akümba kuliji aika alitsüa akok saka asenoki Mokokchung nung mapa inyaka alitsüsa kecha meinyakteter, anungji nisung teimbaka Dimapur leni luadoker. Ibaji dang masü saka akhi asenok tsürabur kibong shia nung tanur tenet ti dak talisa aso, anungji khen nung asenok ya nütsüng aika aren, ajisüaka ajungbenaka kibong shia nung tanur aika sodena yur timmatemtsü asoshi "Family Planning" sentong ajanga government-i kibong nung tanur ka ana dak tali masotsü asoshi tangatetba agüja aru, anungji kibong aika nung tanur ana dak tali masotsü merangba agi küm ishika tsüngda nung, Tsüngremi moaja lir ser nung asenoki maginüba agi metetmeteta nütsüng kanga ajemadokogo. Iba denji ano, tanü tebilemstü kaji kibong aika nung tanur masor, anungji yimtak yimtsüngtem aika nung küm tsüngda tasoba dang nungi tasüba teimba ataloker. Aji oda, tanübo asen lima yimtsüngtem nung tanurtema mali aser aiür asangurtema mali ta taintem kar den tantsür tamburtem dang angutsü. Iba tia yagi, ashiko, memenui arogo aika nung Christian Education aser Youth director menügdaktsüa akok. Atangji, tang Mokokchung nung asenok lenirtemi bilemdangba amaji ya asenok ajak asoshi tebilemstü aser teinyaktsü mapa tuluka lir. Aji oda, nütsüng renloktsüba yabo asenoki asen nübortem dang asen lima nung dang arua liang ta asüba agi makoktsü, kechiyong alima renloka ao dang asenokbo Mokokchung district kija nung adenshia liteptsübjajia tajangzük masü takoksa dang asütsü. Ano, nütsüng renloktsü atema tanur aika asotsü ajungshiba jagi jet ta taginüba nükjidongbo matongtsüa akok. Ajisüaka, asenoki Mokokchung district nung nütsüng renlokdaaktsünüra, asenoki Mokokchung district nung mapa inyaker nütsüng aika arua alitsüsa mapartem tenzüksüla. Item mapatemji asenoki Mokokchung district ajunga masüyonga lendenlenbo tesem ajak Special Economic Zone kümdaktsür, asen nisungtem dang masü saka tangar nisungtema aruagi ayangtsüsa asenoki Industrial Zone kümdaktsütettsüla. Idakji asenoki repranger mereprangjem 'Farming' -a tenzüksü aser yang nung jagi züsentetba aser metsütetba agi 'Food Processing' mapa tenzüka inyaktsü. Iba ama sentong jagi dang rongsenren nung dang masü saka nütsünga renloktsü aser asenok taginüba tongtettsü. Asen lenirtemi aji inyaktettsü imlar.

OLEMSABANG

ABAM INYAKYIM NUNG REPRANGSHITSÜ KAR LIR AMAI BILEMBA LEMSATEPER

~ L. Kika Pongener.

Ao Baptist Arogo Mungdang (ABAM) ya Aor lim arogotem ajunga longjemdak sabang ka lir. Aor lim arogo ajunga angatetepa, sendaktepa, longjema; inyakyim ajak nung lirumedema aotsü nukjidong nung tenteta ayuba sabang ka lir. Küm shia küm tatem nung ABAM küpok lim arogo ajunga nungi teshimtet nübu (Delegates) jaoker, indi mongdang (Central Council) lia, taruba küm tepiyong mungdang teinyaktsü aser mapatong ajak bangzünga telemtetba agir. ABAM taküm alitsü asoshi lim arogotem ajungai Budget agütsür. Anungji item inyakyim ajunga jagi, ABAM nungji lim arogo tuluba/tilaba, nutsüng teimba/tajemba kecha tebandang mali; ajunga küsa temeden lir ta angateter. ABAM nungji lim arogo nung tzüsenba züngsem takar-sensaker, tulu-tilar, laishir, lai-mashir, sannukertem aser nutsüng ajak küsa temeden lir ta angateter. ABAM nungji kija aser telok kecha balaka kibur mali arok meyong ta angateter. Anungji ABAM ajungtsü asoshi tebilemba lemsatepa jembitsü aser zülutsü laishir, lai-mashir aser nutsüng ta mali ajak temeden lir ta angateter.

Aji oda, mapang kar nung; lim arogo nung; arogopur tsüngda obang mapu adoktsü akok; mesura arogo nung tenzükertemi nutsüng-nübur mulong masutsüsa; inyakyim kar nung tashimait/metokmeperi inyaksemtsü akok; mesura arogo den mapetba telemtetba kar agitsü akok. Ibala ama tebilemstüji angadangtsü atema arogopur kija/telok kari mungdang dangi bennura; mesura ano arogo/mungdang ajungtsü asoshi tebilemba (Agenda/Suggestion) kar bennura, lim arogo ka ajangasa masuyonga; indang-indanga ABAM Executive Committee aser Church Advisory Board ajanga agütsütetsüsa sadem-sadema lapoka yutsünungang tajungba asutsü ta bilemer. Angazükba agi kija aser lokti kari ABAM dangi arogo/mungdang ajungtsü asoshi tebilemba (Agenda/Suggestion) kar bennura, lim arogo ka ajanga dang abentsü akok, mesura lim arogo kati 'Recommend/Forward' asunungdang agizüktsü ta bangzüng (Resolution) ka lir ta angazük. Aji oda, angazükba amaji shitak lemteta lira....ABAM Executive Commitee & Church Advisory Board-j i Aor rongnungi tashitemeteter aser tangateter dang shimer mena alinung; arogopur kija aser lokti kari tebilemba kar agütsüra, kobala agizüktsü, mesura kobala magizüktsü; ibaji repranga inyaktsü parnok nem tashi agütsüra; ibajagi peritsü ta bilemer.

Anungji arogo züngsem tajung kija/lokti kari arogo/mungdang ajungtsü asoshi tebilemba (Agenda/Suggestion) kar agütsünura, indang-indanga ABAM Executive Committee & Church Advisory Board dangi abentsü; aser parnoki agizüker; tatsü-talang ajak angadanga shisadanger; arogo/mungdang asoshi tajangzük asutsüsa sura; parnoki telemtetba agitsü akok; mesura ano karbo indi mongdang (Central Council) dangi abentsü akok. Ajisuaka, arogo/mungdang asoshi tajangzük makaba 'Agenda & Suggestion' sura; tabener nem meyipa agütsütsü....ta inyakyimji metong-metonga yura; ibajagi peritsü ta bilemer. Ajisuaka, lim arogo ka ajanga dang abentsüla; aser lim arogo kati recommend/forward asunungdang agizüktsü ta talenba yura; ajibo nübur tebilemba lemsateptsü nokdanga/shibanga ayuba den tepila mali asutsü. Aji oda, mapang kar nung arogo kar nung; arogo nung mepetmesu adoktsüsa; mesura arogo dak mapetba telemtetba kar agira; ibaji angadangtsü atema arogopur kija/lokti kari mungdang dangi bennura; arogo jagi pei tashimait/aibelenba angadangtsü asoshi abenba nungji kodanga recommend/forward masutsü sudi. Anungji iba nungji kanga junga shisadangtsüla kar lir ta bilemer.

Ano ABAM lennitsü atema President shimyim aser ABAM Sanen luden aser komiti balala nung tenzüker shimyim nung temelenshitsü reprangtetba; lennir Nuklu Longkümer aser lennir Limawati Longchar tenati October 15 & 16 anogo nung olemsabang nung lemsatepa züluba-to kanga shitak ka zülüogo. Aji oda, teti agia ABAM Executive Secretary-ji lai poti meteter takotet nübu ka shimer asunung....ABAM President yabo nutsüng (Laymen) nungi shimba tajungba asutsü. Ano ABAM Sanen Luden aser Komiti balala nungjia; nutsüng nungi adentsüla tim nungbo; nutsüng (Laymen) nungi tesadangkabo (50 %) shimnungang tajungba asutsü ta bilemer. Iba amaji shima inyakra; ABAM inyakyim ajak nung tashitaitba aser nutsüng-nübur ajunga lirumedema anir otettsü ta bilemer. Kechiba ABAM anitsü atema Pastor-temi dang teimba ka amokbanger anir onur (?) Iba nungji odi-odia meshitetba miim o kar ali asu (?) ta aiben shisadanger. Anungji ABAM lennisuba shimyim inyakyim ya khen meyipa reprangshitsü lir amai bilemba lennir tajung anati lemsatepa züluba nung-to semloka tebilemba lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Iraq nung Islamic State-i raksatsüba tekülem ki tanaben lapoker

Mosul, Mongputeni/Oct. 20 (Agencies): Islamic State-i yimsü asüba mapang Mosul, Iraq nung raksatsür aliba tekülem ki ana küm aika yanglushia aruba sülen tanaben lapokogo. Iba tekülem ki tanaben lapokba ya Khristanpur samaa aoba region nung asendenshi mapang ka lir.

7th century mapang yangluba Church of Saint Thomas aser Catholic Church of Al-Tahira (The Immaculate ta ajar) semzüktüsü atema yangji alirtem, putir aser linük balala nungi ketdangsürtem Bodhbarnü adenshia liasü.

Mosul nungi arishi küm 27 tain Fadi, shiba iba restoration project nung yaritsü atema küm asem tashi training agia liasü, paia iba tekülem ki tanaben lapokba ya tesem balala nung jenshia aliba Khristanpur asoshi teimla temaitsü ka lir ta ashi.

"Iba ya ajanga bendang lima nung aliba Khristanpur dang yangi tensa tang tajungba aser parnok kidangi meyipa shilangtetsü ta sayur," ta pai ashi.

Tekülem ki anaprong ya Old City of Mosul nung lir, kong IS sepaitemi 2014 aser 2017 tsüngta amenoka yimsü süa liasü. Iba mapang Church of Saint Thomas ya tepuokdak

kumdaktsü aser Al-Tahira nung bomb poklokja raksatsü.

Rara sülen sobaliba tsütsü tongtipang tesemtem asendenshiba nung shilem ka ama tekülem ki ana ya 2022 küm nungi yanglushi tenzük. Aliph Foundation-i Iraq indang State Board of Antiquities and Heritage den lungjemer iba project ya inyak.

France indang National Institute of Heritage lenisüba kübok iba tekülem ki anogoshi yanglushiba maparen ya Paris nung aliba Catholic charity L'Oeuvre d'Orient ajanga ketdangsüa liasü.

Mosul yimti nung Khristanpur shilem 14 liasü, saka tangbo nisung million ana jungnüa aliba nung kibong 60 dang tajemba kumogo, ta Catholic non-profit media outlet Zenit ajanga ashi.

"Iba tekülem ki ana ya long dang masü. Item ya tamangba, puti otsü aser nüburtem indang otsü lir," ta Archbishop Najeeb Michael Moussa, Chaldean bishop of Mosul ajanga ashi.

Item tesem yanglushiba ajanga yimsü ya yirutsütettsü saka mesamatsütettsü ta sayur aser tsüngtsüng atemba shia tamangertem ajaba kisüng masü saka tarutsü indang lir, ta pai ashi.

Tekülem ki tanaben yanglushi metenzük dang parnoki mines aser tapoktsü osettem indoka liasü. Tekülem ki tanaben kanga junga yanglushiba rongnung 13th century 'alabaster door of Saint Thomas' ya lir, koba farsh marble nung Khrista aser nütsüng 12 noksa keta lir.

Normandy nung Cornille Havard-i atsüngba tsüngtsüng ya tangbo Mosul nung angashir. Kasa foundry yagi Notre-Dame de Paris indang tsüngtsünga yanglu, ta Zenit ajanga ashi.

Tsüngtsüng tem nungya, "The truth will make you free" aser "Peace I leave you, my peace I give you" ta zülua lir.

Mar Toma ya Orthodox yimya nung meshitet aser Al-Tahira ya Brehostibarnü meshiteta liasü.

Al-Tahira tanaben lapokba sentong ya Iraq indang Chaldean Church tekolak Patriarch Louis Raphaël Sako lenisüba nung agi, kong Syriac Orthodox Patriarch Mor Ignatius Aphrem II, Iraq indang Minister of Culture Ahmed al-Badrani, Nineveh Governor Abdul Qadir al-Dakhil, French Ambassador Patrick Durel aser UNESCO aser uvre d'Orient nungi ketdangsürtem dena liasü.

Uttar Pradesh nung Khrista dangi meyipba tesem putet

Lucknow, Mongputeni/Oct. 20 (Agencies): Haribhanpur yimtsüng nung tamangba yimsü melendaktsüba dak sendakba nung tai tonglokja alir nisung asem October 18, 2025 nü Uttar Pradesh nung Prayagraj district kübok Phulpur Police-i apu. Iba ken o nung tai tonglokja alir nisung pezü buba ya jenshia senzür aser pa aputsü bushiba mapang lir.

District Co-Convenor, Bajrang Dal, Vishva Hindu Parishad, Shantanu Tiwari nungeri ken o benokba sülen parnok ya apu.

Shantanu ajanga ken o agütsüba nung police dang "prayer meeting" tenüng nung tamangba yimsü melenba indang shia liasü. Osang jangjaba sülen police temi nisung asem apu aser ozüng agiba melaba maparen inyak tenzükogo.

Shantanu-i Phulpur Police Station nung tezüluba ka agütsüba nung, Khristan missionary temi Raghunathpur yimtsüng nung anogo ishika tamangba yimsü melendaktsüba mapa inyakba indang angashia arur ta ashi.

October 18, 2025 nü anepdang 10:40 ako nung iba ama senden ka yimtsüng nung amentsü lir ta pai osang angazük. 'Community discussion meeting' tenüng nung tamangertem adenshia lir, kong Hindu nunger yimdaklir tem Khristan yimsü agizüktüsü asoshi mesüzüker ta ni angazük, ta pai ashi.

Shantanu den külem Bajrang Dal activists tem iba tesem tonga ao aser missionary telok

kati yimdaklir dang parnok tamangba yimsü yutsütsü ajunghia aliba angu. Pai ashiba agi, missionary temi iba sentong nung dena alirtem dang Khristan yimsü agizüker nem sen, aben-süoshi aser danga teyari agütsütsü ta ashi. "Item inyakyim ya Hindu nunger anema lir," ta Shantanu-i ashi aser missionary temi osang tiazü prokshia kecha memetet aliba yimdaklir tem tamangba yimsü melentsü asoshi mashi leni anisar ta aitsü.

Shantanu-i ashishiba nung ajemdaker FIR ya Bharatiya Nyaya Sanhita (BNS) 2023 aser Uttar Pradesh Prohibition of Unlawful Conversion of Religion Act, 2021 kübok Ramkumar Pal, Ramsharan Gautam, Tribhuwan Gautam, aser Sarita Gautam nunger anema benoka liasü.

FIR nungya iba senden ya "community discussion" ta shia liasü. Phulpur Police Station area kübok Raghunathpur yimtsüng nung Hindu nunger tamangba yimsü melendaktsütsü atema Khristan missionary temi iba senden ya ayongzük.

Iba anogo missionary temi "community discussion meeting" tenüng nung senden ayongzükba indang osang angazükba sülen pa iba tesemi ao, kong Hindu nunger aika dena liasü.

Iba tesem nung Khristan missionary temi Hindu nunger dang parnok yimsü yutsür Khristan yimsü agizüktüsü ajungshiba pai ngutet. Parnoki Hindu nunger dang Hindu tsüngrem tem yutsütsü aser sen

aser missionary school tem nung mapa agütsütsü mechi pei kidang Yisu Khrista indang noksa ayutsü shia liasü.

Iba prayer meeting nung aliba nisung kari nüburtem Khristan yimsü agizükdaktsüba atema taa jenti angu aser Hindu yimsü nungho yamaji senpet mangur ta ashi, ta ken o benokeri police dang ashi.

Pai iba inyaksangshi nung tai apu, aser tai tonglokja alirtemi pa tepsettsü meranga iron rod agi azük, saka pa iba tesem nungi jena oa takum kumzük.

Bajrang Dal ajanga tesüiba mapanga iba amala tesem aika putet ta Shantanu-i ashi. Yamaji atalokba ken o ka nung tai tonglokja alir nisung 13 tepuokdaki yok. Tai tonglokja alirtemi iba ken o atsülangdaktsü, kechiaser parnoki anticipatory bail applications aika benokba ajanga ken o jembishinüba nung menudaktsü. Shantanu indang okatsüri iba ken o nung bail applications tem thitsü.

Tang tesüsa atalokba ken o nunga pai meranga inyaka region nung iba ama inyaksangshi anendaktsütsü, ta Shantanu-i ashi.

Bushisüngdangba mapang tai tonglokja alirtemi yimdaklir dang parnok tamangba yimsü yutsütsü ajungshiba jangjatet, ta police ajanga ashi.

Khristan yimsü agizükba melen senotsü teyari agütsütsü aser mapa agütsütsü parnoki nangzük. Ketdangsür temi iba ken o ya ozüng nung aliba ama bushiyonga tapet temerenshi agütsütsü ta ashir.

ANOGO ABEN TSÜNGREM DEN

Laishiba

Tsüngremi apuoktsüba Lai shia ano tesayutsü, tarütsütsü, metongshitsütsü, temeshiba nung sayutsü tajangzük kar. 2 Tim. 3:16.

Baptist teloki nisungi yangluba kaket manidaker. Laishibaji parnok tamang leniba lir. Ibai parnok tanishir ka lir.

Tsüngrem O nung tashi lir. Tsüngremi iba nung tamaitsü ajena lir. Khrista takangba misem yangi lir aser tesamaba lima ka khuret agi iba (misem) nükjitongji ajungmesodaktsü. Mapang ajunga nung iba osangji ayimoktsür aser teti tatem makaba nung ayimtentsü. Putu aika ibai renloka aor, meimchir tematiba tejangraba asadanger , meimchir nüngdak taroktiba tonga aier. Iba osang teti tatem maka atentsü. Laishibai teti tatem maka Tsüngrem nükjitong sayur. Iba yagi rishikangshi, timtem, tesempatep ajak sünepdaktsür. Memetetti aliba metetta kumdaktsür, teyimla makai alirtem nem teyimla agütsür, tepela agütsür, sensaker takar kumdaktsür.

Asenok tebilemba onük asem nung sendaktsüla: Kechiba asenoki Laishiba amanger? Kechiba asenoki Laishiba sayutsüngir; kechiba asenoki Laishibaji meimer?

Kechiba asenoki Laishiba amanger?

Asenoki Laishibaji amanger kechiaser ibai Tsüngremi apuoktsüba lir. Tsüngrem dak alema shingaia kin ajak asoshi kaket ka agütsütsü makok. Ibai mezüngdangtet putu osang, alima ajunga dang mepishiba, putu ajak nung ozüng aser alima rangpen tanebtsü. Ibai tulu, tila, takar, sensaker ajak den amshitetba kaket lir. Iba indang yamai junga shitet:

"Nisung yangluri dang iba ama kaket yanglur asütsü akok. Asenoki iba kaket rasati süra tematiba jenjang nung rasaa shitet. Iba omenji tesatemtiba, iba nükjitong tesatemtiba, iba telok tulutiba, iba tawabang makonger, iba tesangwa tejajngatiba, iba ken tanangtiba, iba tebilemba shisatsü kotaker tebilemba, iba ola jangratemtsütiba lir. Atangji, "Laishibaji nisungi zülutettsüba kaket masü."

Apuoktsüba Laishibaji indoker nai koba nung Khristan yima amendaka lir aji tashi itta yangludi süra, nai iba longshitemji loktoker; nai kiji raksar. Laishiba amangba arogotemi dang temenen anema raratsü akok, temeshiba asoshi tashi tait, shirnoki amanger parnokji tanelar anir arur mapa inyaker tongti, sayutsüngiang aser Laishibaji lidakjang. Tanga kaket Laishiba asütsübaji temenen nung asonga aliba lima tsüngdang tashi mait, temüli tatsük, tasü mait aser teyari asoshi teti ayimtentsü.

Laishiba zülurji tejangja. Iba nung chubatem i züluba lir, sangro züluri ajanga züluba lir. Iba nung chubatem, emperor tem, shisakartem ken mejemertemi, philosopher temi, angopurtemi, statesmentemi züluba otem ita lir. Ibai tepuokdak aliba nisung, lisem lima nung aliba nisung, rem lanu aser tzü tasüngtet ajanga zülü. Iba zülurtemji angopurtem, alimelen sarurtem, sannükertem, sensakertem , takartem, yimsüsürtem, ainkartem, tepuokdak, captains, ozüng yanglurtem, obendangertem, tangazükba akartem, tesayur tajunglibatem sayurtemi akümba lir. Iba den medemdangtsüsa tanga kaket mali. Ibai küm noklang ter pungu zülü. Tezülurtem timba parnok rongnung metettepa mali asü. Parnoki juri (independently) süa dang zülü aser medemdangtsü makokba kaket, Laishiba adok. Ibai kodanga tejen küma mali asü aser kodanga makümtsü. Tsüngremi dang iba ama kaket agütsütsü akok.

Bilemang! Ibai arogo danga tambu, "sobaliba dang nungi ochiba" university tulutiba dang nungi tali tashi temetetba, ochi o bendangdak nungi chichiba ochi, ainkartem dang nungi tali aibelen maliba, tamang temzüng (creed) dang nungi tali ochiba. Iba nung mezüngbuba tesüngmangtsü aser nisunger leman asoshi kotaker tesangwa.

Iba anema jembi, saka kodanga kuli magütsü; mejungi inyak saka kodang mesama. Kaisar yimli süatok, "Tatem maka Rom yimti" liasü saka akhüm ka dang liasü; Napoleon tamaren teti asoshi anen; Pharaoh tasü mang wazüka ayuba lisem nung anogo shia rembanga alur; tyre tebilemtetba ka dang, saka Tsüngrem o taküm alir. Nisungi inyaktetbaji ken atema dang lir; Tsüngremer mapa teti asoshi lir; Tsüngremer mapa teti asoshi lir. Sobalibai iba asoshi leper aika atu: Yihuda aikati tebang mesep agi ibai ashiochtsü; Peter aikati tenangzükba magizük saka Tsüngrem amongtema alir.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tokten

(v) ma ta arakzü, atepten (fidgety, move restlessly)

* Tanuri tetsü dang amtsük meshia toktena ajep.

Tokten

(v) tsük bendenba (heap)

* Takar jentang tsük masem tokten.

OLONG PAITEP # 7306

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T _ _ _ lu - (3)
10. Takdang temalen - (9)
11. Tesa _ _ _ a - (3)
13. Ajungbena temulungjang
tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

1. Reprangdaksü - (4)
2. _ _ _ ur - (3)
4. Kiojen yangludak - (6)
6. _ _ _ _ _ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. _ _ _ _ _ adenshi - (4)
14. Tsünüsenbongtsü adokdak - (3)

OLONG PAITEP # 7305 TELANGZÜBA**TIPIEN :**

1. Kasa, 6. Rangben, 7. Mait,
9. Poktet, 11. Ati, 13. Atasa, 16. Rür,
17. Rajang, 20. Lanu, 24. Nüngjem,
25. Süra.


LANGTSÜNGLEN :

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Tajü, 21. Ano,
22. Onü, 23. Kua.

NAI-A YA METETTER

October 17, 2025 nü China kübok Hunan Province nung drones 16,000 shi amshia anüng nung süngdong tulu ka aser naro tulu ka sayua liasü aser iba atema Guinness World Records nungi kuli atar.

Liuyang nung iba firework show ya nisung million aikati repranga liasü aser iba ya Liuyang-i alima dangi "love letter of light" lir ta tayongertemi ashi.

Manipur Governor-i Noney nung tallest railway bridge semdang

Guwahati, October 20, 2025

(Agencies): Manipur Governor Ajay Kumar Bhalla-i alima nung tallest railway pier bridge yangluba semdangogo.

Honibarnü Governor Bhalla-i Noney district nung Ijei River ajanga yangluba apu semdanga liasü. Iba ya 111-km Jiribam-Imphal railway line nung shilem ka aser iba ajanga Manipur aser Northeast nung connectivity tajungba akümtsü.

Governor den railway

engineers aser district ketdangsürtem aden aser parnoki iba apu yangluba osang lemsatop.

Iba apu ya ali nungi azüklen 141 metres tur lir aser global records aika ajangtsü.

Iba apu ajanga Montenegro nung 139-metre Mala-Rijeka viaduct otsü ajangtsü aser alima nung tallest railway pier bridge akümtsü.

Iba apu ya Khumji village anasa lir aser renemba sülen

apuji 555 metres talang asütsü.

Jiribam-Imphal railway line ya 2008 küm national project ka sangdong aser northeast atema tongtipang railway line ka ta züingshir.

Iba lenmang nung major bridges 11 aser minor bridges 137 lir aser iba nungi major bridge 5 aser minor bridges 101 renemogo.

Yashi Noney Deputy Commissioner Sharath Chandra Arroju aser Superintendent of Police nati anir tongti ketdangsürtemi Governor Bhalla pelashishia agizük.

Pai government departments balala lapokba stall tem sema senzü.

DC office nung senden ka amendang Deputy

Commissioner-i Governor dang Noney district nung terenlok mapa balala inyakba aser tayongzükbatem lemsatop.

Arunachal lennirtemi Zubeen Garg nem tetushi agütsü

Itanagar, October 20, 2025

(Agencies): October 19 nü Naharlagun nung nüngtugu kentener Zubeen Garg

bilemtetba sentong ka nung Arunachal Deputy Chief Minister Chowna Mein aser Cultural Affairs Minister Dasanglu Pul na aden.

Garg-i entertainment adena oa shilem agiba aser northeast nung kin temeyoktep balala

longjemtsü atema sobaliba apu ka ama shilem agiba bilemteta iba sentong agi.

Pai mejema atenba kentem Assam, Arunachal Pradesh aser kidanger state tem nung regional identity atema naklu kentem ama aküm.

"Garg-i temulung taroktiba nungi shilem agiba bilemteter. Pa indang music ajanga teimla aser konang bentsür aru" ta

Women and Child Development Minister Dasanglu Pul-i ashi.

Zubeen garg ajanga putu aika ajungmesotsü aser pai ajungmesortemi pa indang senmang tejakleni bener aotsü ta Pul-isa ashi.

Naharlagun sentong nung musical performances, personal recollections from colleagues, aser prayer ceremonies agia liasü.

Churachandpur nung power department employees 7 züka merenshi

Imphal, October 20, 2025

(Agencies): Manipur State Power Company Limited (MSPCL) nung mapa inyaker nisung 7 dak mejangjaba nisung kari teka sangshiogo.

Parnok ya Churachandpur district kübok Tuibuang nung aliba 33/11 kV sub-station nung inyakerterem lir.

October 18 nü complex telung nung mejangjatetba

nisung kari parnok dak teka sangshi saka iba ya kechi atema inyakar kuli kecha mali. Iba sub-station nung officer-in-charge dak-a teka sangshia liasü.

MSPCL-i par staff dak teka sangshiba aitsüogo aser iba mapa inyakerterem pua merenshitsü takhangba agütsür.

"Onoki ketdangpurtem dang

tekaraba nung bushisüngdang asütsü aser ozü employees nem temetem agütsütsü akhangar" ta company-i sangdong ka nung shiogo.

Iba lendong ya President's Rule aliba mapang ka atalok aser iba atema nisung aser telok balalai aitsür. Ajisüaka, iba osang zülü tashi nung ketdangpurtemi aibelenertem ano mejangjateti lir.

Tripura nung ozüing alema arur nisung 21 apu

Agartala, October 20, 2025

(Agencies): Border Security Force (BSF)-i Tripura nung Indo-Bangladesh arrtsü anükba akangshiogo aser ozüing alema arur nisung 21 apu.

October 19 nü BSF-i tesem balala nung Bangladeshi nung 11 aser Rohingya nung 10 apu.

BSF teams-i Agartala Railway Station nung nisuing kar dak taitüsü keta ajitet. Parnoki mita aodang Bangladeshi nung 11 ozüing alema aruba aser tangalen aotsü aliba apu.

"Parnok ya routine checks mapang apu aser tepuokdak lir" ta BSF spokesperson kati ashi. North Tripura nunga BSF

sepaitemi Rohingya migrants 10 apu. Parnok rongnung tetsür aser tanurtem dena lir. Parnoki Bangladesh-i aitsü merangdang apu.

"Parnok dang asüngdangya asüadang parnok Delhi aser Jammu nungi aru aser Bangladesh kübok Moulvibaza-i aotsü merangba nangzük" ta ketdangsür kati ashi.

Rodrigo Paz-i Bolivia tir election nung takok nguogo



La Paz, Mongputeni/October 20 (Agencies): Bolivia nungertemi centre-right Christian Democratic Party (PDC) nungi Rodrigo Paz linük tir asütsü shimogo, aser iba ajanga Movement for Socialism (MAS)-i küm 20 shi linük yimsüsüa arua aliba tembangdaksüogo.

Ballots azüingba shilem 97 nungi Paz-i shilem 54.5 angu aser right-wing taoba interim Tir Jorge "Tuto" Quiroga-i vote shilem 54.4 ngua liasü, ta linük Supreme Electoral Tribunal (TSE)-i metetdaksü.

Arishi küm 58 tain Paz-i tebu tsüingsü nung anidaka pa-a yimden yimsüsüba nung denogo. Tebu Jaime Zamora ya taoba mapang left-wing Tir liasü.

United States nung economics azüingba sülen Paz Bolivia nung kidangi meyipa ao aser Tarija yimti indang councillor aser mayor inyak, aser iba sülen 2020 küm iba tesem indang senator kuma liasü.

Pai, election atema nübuyimba mapang saru aser tariff ajemtsütsü aser national sorkar decentralize sütsütsü tenangzüka agütsüogo.

Tir election result sangdongba sülen Paz den külemi Ttatong Tir mapa asoshi toktepla Edmand Lara-i, telongjem asoshi ayongzüko.

Colombia aser United States mangatettep adoka lir

Bogota, Mongputeni/Oct. 20 (Agencies): Hopta tatemlen United States Tir Donald Trump-i teyari agütsüba anentsü amokmerenba den Colombia tir anema o tamajung jembiba mechi United States nung aliba par indang ambassador meyipa jaogo.

Iba South American linük indang Ministry of Foreign Affairs ajanga Hombarnü ashiba agi, Ambassador Daniel Garcia-Pena ya Tir Gustavo Petro ajurutsü atema Bogota tonga aruogo, shiba dang Trump-i "illegal drug leader" ta Deobarnü aja.

Venezuela nungi timba sür temesepba mozü shibelener ta Trump-i tai tongloksüba rong tem nung US-i Caribbean nung

"Asenoki diesel aser gasoline supply atema jenjang agütsüla. Nüburtem timtemdar. Asenoki chiyongtsü jenjang yanglyushitsüla aser ochi mashi inyakyim ajak tembangdaksütsüla," ta Lara-i ashi.

August ita preliminary election nung MAS party kanga mejungi tamakok anguba sülen Deobarnü election ya agia liasü. Taoba mapang left-wing Tir Evo Morales election nung tokteptsü atema memelaba den Tir mapa toktsütsü alisang Luis Arce shiba Morales den mangatettep adoka liasü, pai election nung metokteptsü asoshi telemtetba agiba sülen MAS party ya akoksa liasü.

Okadaki, term aser party affiliation dak sendakba nung Morales candidacy anema obendang agüja liasü.

Left-wing coalition yongtsü nung tebendang adokba aser iba den linük rongsenketzüng kanga mejungi kümer aliba mapang MAS puri sorkar kümtettsü timla kangabo maliasü.

National Congress tema nung Tir tasenba ya Morales-i maneni kanga nongshitsü, shiba maneni kanga nüngtugu lir aser talisa Bolivian nunger lisopurtemi pa maneni pusemdar.

Deobarnü Morales-i osangbenertem dang ashiba agi, candidate ana yagi Bolivia

amakba mechi linük ana tsünga mangatettep ya tuluba akum.

Item rong amakdang nisung ter dak tema tepsetogo aser ibai US aser international law anema inyakba lir ta repranger, aser iba atema Petro-i kanga sashia aija liasü.

Deobarnü social media post ka nung, Colombia nem teyari agütsüba anentsü aser linük nung temesepba mozü shibelenba azüoktsü atema Petro-i mera tali magira US-i agütsü aser tajunglen nungi meinyaktsü, ta Trump-i amokmerena liasü.

Hombarnü Colombian Interior Minister Armando Benedetti-i item o ya Colombia amaktsü amokmerenba mesüra Colombia anema mitkar temi

nunger shilem tilaka atema dang nokdaker.

"Parnok ya popular movement aser Indigenous movement tenüing nung menokdaker," ta Morales-i ashi.

Arce-i November 8 nü office toktsütsü. Pa 2020 küm shim aser term ka abenba sülen tang mapa toktsütsü lir. Bolivia constitution-i nisung ka term ana abentsü melar, saka pai tanaben metokteptsü atema telemtetba agia liasü.

Bolivia ya tang rongsenketzüng nung kanga timtemba mapang ka lir. Parnok kümshia annual inflation 25 percent shi lir aser US dollar aser totzü agia kanga anünger.

August 17 nü general election agütsü lia Bolivia nungertemi totzü jenjang aika akümba aser totzü alitsü atema mapang talanglang atatepba, amtsük aser tanga tenüngdakba osettem nung jenjang aika akümba anema yimtong nung longkak aita liasü.

Morales lenisüba nung Bolivia küm ter dak tema kanga renloka ao aser lisopurtem ajungketa liasü. 2006 nungi 2019 tashi inyakba mapang Morales-i gas sector nationalised sütsü aser sensaktia tajemba kümdaktsütsü atema sentong balala benoka inyaksangshia linük tejakdangi ania liasü.

Ajisüaka Morales, shibai tzümpung melenshia aoba ken o indang yimjak nung kanga jembia arudar, pai linük gas sector atsülangtsü memulung aser iba ajanga 2013 küm energy revenues USD billion 6.1 aliba 2024 küm USD billion 1.6-i asepzüka lua liasü. Iba ajanga totsü, wheat aser tanga chiyongtsü bener arutsü atema nüngdakba linük foreign exchange kanga ajema kuma liasü.

Kasa mapang nung Paz-i fuel subsidy agütsütsü tebilemba ali mali mejangja. Iba subsidy agütsüba ajanga sorkar dollar billion aika akoksar.

inyaktsü ama agizüker ta shia liasü.


Hopta tatemlen US-isa Colombia nungi aruba rong ka nung Hokulbarnü amak ta ashi aser temesepba mozü shibelenba nung left-wing rebel group dena lir ta aitsü. Ajisüaka Trump administration-i kuli magütsü.

Petro-i social media post balala nung telangzüba agütsüdang, US-i tepseter rongnung ka Colombia nunger angopur Alejandro Carranza liasü aser pa temesepba mozü shibelenba den kecha nunga sendaktepa mali, ta ashi.

"US sorkar ketdangsur temi territorial tzüym nung ozü temeden nung aibelena nisung tepset," ta pai zülua liasü.

SOYIM POJO ASEM AONG MENDEN UNGMAIMPANG TENÜNGSANG AGÜTSÜR

Wb. O. Tinu Longkümer Tatar aser Wt. Temsünungla Pongen na jala **Kr. Lanuienlan Longkümtsür**-i Master of Science, Department of Geology, Bangalore University nung Shri. C.C. Suryanarayana Rao Gold Medal ngutetba atema tenüngsang den tetushi agütsür. Tsüngremi ne wadang ajak nung maneni len ania moajangma.



Sd/-

1. Imküm Pongen, Tatar
2. O.Tinu Longkumer, Tatar
3. A. Matsüing Salong, Tatar

Trump-i Russia aser Ukraine dang rara anentsü ashi



Washington, Mongputeni/Oct. 20 (Agencies): United States Tir Donald Trump-i Russia aser Ukraine dang tang 'battle lines' nung rara anentsü ayongzüük - koba ajanga Moscow ket nung Ukraine nunger litsü tuluka alitsü.

Deobar aonung osangbener den jembidang, linük ana yagi rara ya anener jembishinüa litsü-lika indang tejangjaba nung bentettsüla, ta ashi. Tang front lines ya Donbas region ajanga aor.

"Parnoki tangsa battle lines nung anentsüla, kidangi aor, nisung tepsetba anentsüla aser tembangtsüla," ta US tiri ashi aser tatembang pangzüng ka atema tejangja jembishinü akatsü tasak alitsü ta ashi.

Donbas nung kechi asütsü ta asüngdang dang, "Ibaji tang aliba ama südaktsüti. Ibaji tang südangtsü - iba ali shilem 78 shi Russia-i agir alitsü ama bilemer. Tang aliba amaji yujang. Parnoki khen lir jembitettsü," ta Trump-ilangzü.

Taoba mapang Ukraine-i par li ajunga tanaben agütsü shia aru. Trump-ia taoba ita ang Ukraine-i mitkar tsütsü takok ngutettsü aser Russia-i amokbanga aliba litsü ajunga tanaben agitettsü, ta shia liasü, kong Crimean Peninsula aser Ukraine anüdoklen tesem kar lir.

US tir, shibai Russia aser Ukraine tsünga rara yakta tatem kati arudaktsütsü nangzüka lir, pai Russia Tir Vladimir Putin den Hungary nung ajuruteptsü lir.

Trump-i taoba hopta White

House nung Ukraine Tir Volodymyr Zelenskyy den ajurutepa liasü aser atsü-anem lira rara ya kanga kera tembangtettsü teimla lir ta shia liasü.

Deobarnü Zelenskyy-i Trump dang Putin tali ajungshitsü ayongzüük aser Russia tir ya Palestine nunger Hamas telok den mesüktepa lir ta ashi.

"Putin ya mesükteper saka Hamas dang tashi taitba," ta Zelenskyy-i NBC News dang ashi.

Gaza nung ceasefire atema Trump tetsüngtai aiba ajanga Ukraine nung rara anentsü teimla agütsür, ta taoba hopta Ukraine tiri shia liasü.

Kasa mapang Zelenskyy-i US dang Ukraine nem long-range Tomahawk missiles agütsütsü asendenshir ajungshia liasü. Trump-i iba atema telangzüba kecha magütsü.

Tawa ang Trump-i linük security atema US-ia Tomahawk ya nüngdaker ta shia lir.

Taoba tir Joe Biden kübok US-i Ukraine nem tzü-a meseni yaria mitkar, budgetary aser humanitarian aid atema sen dollar billion aika agüja liasü.

Ajisüaka Trump-i Ukraine nem teyari agütsüba ajema akumer aser European linüktem dang Kyiv atema US nok-nü alitsütsü ajungshir.

Taoba mapang Soviet republics nung aliba linük tem NATO züngsem akumer ta shia Russia-i tashi ajak amshia February 2022 nungi Ukraine amak tenzüük.

27 Buba MDFA Trophy Quarter Final Osang



Team Gilgal aser Suoer Seniors FC tsüingda asayaba mapang tangokba noksa nungji angur.

Mokokchung, Mongputeni/October 20 (TYO):

Imkongmeren Sports Complex Mokokchung nung 27 Buba MDFA Trophy tanü nungi Quarter Final asaya tenzükogo.

Tanü mezüingbuba Quarter Final asaya Team Gilgal aser Super Seniors FC tsüingda asaya aser iba asaya nung Match Patron ji Mokokchung Municipal Council nung Deputy Chairperson Wb. Lanuakum liasü.

Iba asaya minute 41 buba nung Super Seniors nungi J.no-11 Sentisang-i goal-1 yok, saka minute 45buba nung Team Gilgal nungi J.no-17 Mughato Chishi-i

goal-1 yokteta telok ana kasasa aküm.

Telok ana kanga dang merotepa asaya arur kelen minute 71buba nung Super Seniors FC nungi J.no-21 Nyithung-i goal-1 yoktet nung Super Seniors FC teloki goal 2-1 agi Team Gilgal kokteta Semi Final asayatsü maongka ajangzüktetogo.

Doyang Strikers MKG aser Sangpang Riju SC tsüingda tanabuba Quarter Final asaya nung Match Patron Mokokchung District BJP President Wb.O.Tinu Lkr liasü.

Doyang Strikers MKG nungi J.no-9 Yhoto-i minute 2

buba nung goal 1, minute 20 buba nung J.no-15 Gamchiu-i goal 1, minute-36 buba nung J.no 10 Khanngan Horan-i goal 1, minute 48 buba nung J.no-9 Yhoto-i goal 1 aser minute 72 buba nung J.no-7 Eshong-ia goal 1 ta yokteta item goal-5 jagi Doyang Strikers MKG-i Sangpang Riju SC ayong ayonga kokteta Semi Final asayatsü jenjang ajangzüktetogo.

27 MDFA Trophy

21-10-2025 Quarter Final Fixtures

3rd Quarter Final, 12:00 noon: Telongjem FC Vs Sports Society Soyim

4th Quarter Final, 2:00pm: Chargers FC Vs Thunder Bolt SC.

Satwik-Chirag na French Open asayatsü renema lir

Mongputeni/October 20, 2025 (Agencies): Asia nung asayamung ishika nung kanga junga asayaba sülen India nung tebur tarep asayar Satwiksairaj Rankireddy aser Chirag Shetty na Mongolbarnü nungi tenzuka French Open Super 750 badminton tournament nung asayatsü renema lir.

Satwik-Chirag na Hong Kong aser China Masters naprongla nung final tonga asayba den taoba hopta Denmark Open nunga semifinal tonga asayaogo. French Open nung tena mezüingbuba asaya Indonesia nung tarep Muhammad Rian Ardianto aser Rahmat Hidayat na den asayatsü.

Satwik-Chirag nati Denmark Open nung Ardianto aser Hidayat na quarterfinals nung kokogo, saka game asem asayaba sülenang akok asünung Rennes nungbo iba dang nungi tajungba asayatetsü imlar.

Satwik-Chirag nati taküm asayamung ka danga koka mali saka junga asaya arudar aser tenati World Championships nunga bronze medal nguogo.

Kasa asayamung tebur kija

asaya nung, Sen shiba Hong Kong Open nung final tonga liasü pa Ireland nung asayar Nhat Nguyen den mezüingbuba asayatsü. Kasa mapang nung US Open champion Ayush Shetty-a Japan nung asayar Koki Watanabe den asayatsü. Taoba küm Canada Open nung Koki-i Ayush koker lir.

Tetsür kija asaya nung lanur asayar Anmol Kharb, shibai iba ita tetenzüklen Arctic Open Super 500 semifinal tonga asaya liasü, la mezüingbuba round nung top seed Korea tsür An Se-young den asayatsü.

Tetsür kija asaya nunga Upadhyaya, China tsür Han Yue den aser Unnati Hooda Malaysia tsür Karupathevan Letshanaa den asayatsü.

Tebur tarep asaya nung Pruthvi Krishnamurthy Roy aser Sai Pratheek K nata asayatsü aser tetsür tarep asaya nung Kavipriya Selvam aser Simran Singhi na külem India tsür Rutuparna aser Swetaparna na den asayatsü.

Tarep temeyoktep asaya nung Dhruv Kapila aser Tanisha Crasto na den Rohan Kapoor aser Rutvika Shivani Gadde nata asayaba angutsü.

Anogo 882 sülen Medvedev-i mezüingbuba asayamung kokogo



Mongputeni/October 20, 2025 (Agencies): Anogo 882 sülen Daniil Medvedev-i Deobarnü mezüingbuba aser ATP Tour asayamung 21buba kokogo.

Almaty Open final nung pai 7-5, 4-6, 6-3 agi Corentin Moutet koka liasü.

Arishi küm 29 tain Russia nung asayar yagi tesüsa 2023 küm May ita Italian Open akok aser iba sülen pa U.S. Open aser Australian Open final densema final trok nung tamakok ngua liasü.

"Yimti 21 nung title 21 benogo," ta Medvedev-i iba alizüing tongtetba indang lemsatapa liasü.

Iba asaya ajanga pa tanen makai atasa-a asayatsü tendangogo. Medvedev shiba tang jenjang 14buba nung lir pai asaya tetenzüklen aibelen aika mena aser mezüingbuba set ana nung unforced 13 mena, saka Moutet-ibo aibelen pezü dang mena liasü. Arishi küm 26 tain France nung asayar, shiba tang mezüingbuba asayamung ka akoktsü atema meranga asayadar, pai maneni nongshia

asaya saka decider nung Medvedev-i ace asem atonga aoba sülen pai asaya koka liasü.

"Ni asaya nung junga masayatetba atema kangabo mepelar, saka takok anguba ya jangrademtsüka. Point angutsü kanga nüingdaka aliba mapa ni junga asayatetogo," ta Medvedev-i ashi.

Taküm Melbourne, Roland Garros, Wimbledon, aser Flushing Meadows nung kanga kara tsükatokba den asayamung balala nung junga masayateti aruba sülen Medvedev-i tang iba asayamung koktetogo. US Open sülen pa coach Thomas Johansson aser Rohan Goetzke na den inyak tenzük aser Beijing o Shanghai nung semifinal tonga asayaogo.

Almaty nung takok anguba ajanga pa ATP Finals nung asayatsü atema timla agütsür, kechiyong pa jenjang 12bubai atutsü aser ATP Finals nung asayatsü atema point 875 dang nüingdaka lir.

Set ana kanga toktepa asayaba sülen decider nung 4-3 aliba mapang Medvedev-i Moutet indang serve break asü aser asaya koka liasü. "Tatembangbuba game jangrademtsüka liasü aser iba title abenba atema pelar," ta pai ashi.

Moutet atema pa indang career nung tang agi tasembenbuba final nung tsükogo. Pa 2020 küm Doha aser 2025 küm Mallorca nunga final nung tsüka liasü.

Nottingham Forest-i coach Ange Postecoglou mapa nungi anentsüogo

Mongputeni/October 20, 2025 (Agencies): Honibarnü kidang Chelsea goal 3-0 agi makokba sülen Nottingham Forest-i manager Ange Postecoglou anogo 40 sülen mapa nungi anentsüogo.

Forest kibur Evangelos Marinakis-i City Ground nung asaya matem tsüingda menden toktsür ao aser mapang tatsüka dang lir coach mapa nungi anentsütsü telemtetba agia liasü.

"Imlaba ama result mongutetba aser junga masayatetba sülen head coach Ange Postecoglou mapa nungi anentsüba Nottingham Forest Football Club-i jangjashitsür. Tang atemabo club-i iba dak alaka kecha shia matatsü" ta club sangdong ka ajanga X nung metetdaksü.

Postecoglou ya September 9 nü shim aser pa lenisüba nung club pur tetoktepba ajak nung asaya ti nung asaya ka danga mako aser Premier League asaya pongu nung point ka dang nguteta liasü. League nung Forest pur tang 17buba nung lir, aser relegation zone-i point ka agi dang mai lir. Taoba ita Nuno Espirito Santo mapa nungi anentsüba sülen parnok tang asaya aliba season nung manager tasembuba bushidar.

Postecoglou, shibai taoba season Tottenham nungi Europa League kokogo, pai Chelsea den



masaya tsüingda Hokolbarnü pre-match press conference nung, pa nem club ka nung mapang dang agütsüra takok marok kabo benerang tembanger ta shia liasü.

Ajisüaka Chelsea makokba sülen club nung pa mapang tembangogo.

Forest puri asaya kanga junga tenzük saka maongkatem magiteti liasü. Chelsea atema Josh Acheampong-i minute 49buba nung mezüingbuba goal idaktsü aser minute asem dang lir Pedro Neto-i free-kick ka

ajanga par team asoshi tanabuba goal idakja liasü. Iba sülen Captain Reece James-i club nungi 200benbuba asayaba mapang tasembuba goal ya idakja parnoki asaya 3-0 agi koka liasü.

Chelsea team nung Cole Palmer, Benoit Badiashile, aser Enzo Fernandez nung amala tongtibang asayartem maliasü, saka Forest asoshi parnok kanga tashi tait liasü.

Toba mapang Burnley aser Everton manager Sean Dyche-i Postecoglou melentsü akok.

BILEMDANGANG

"Ochimashiba ya pei-i ajangshidang angateter."